

摘藻堂四庫全書薈要

集部

欽定四庫全書薈要

集部

御選明詩卷一百十一



詳校官原任主事

臣

李斯咏

欽定四庫全書薈要卷卷一萬八千六百十一

集部

御選明詩卷一百十一

七言絕句十一

戈用泰

煙雨樓

平波四面八窗開
盡日笙歌載酒來
去矣詩人誰管領
年年煙雨自樓臺

章士雅



紀懷二首

鳥聲啼散一簾花
遙憶春風怨歲華
何事半生能薄倖
綠楊深處即為家

江城二月客衣單
況是春風十日寒
鄉國梅花吹欲盡
不須橫笛倚朱闌

吳正志

曉霽即事

雨痕收盡亂雲飛
溪上青山轉翠微
蠶婦不知隄上濕

採桑踏遍露華歸

臨流口占

家傍寒塘魚自肥
踈罾一試夕陽稀
雖然未是忘筌者
也免侯門彈鋏歸

鄭明遜

憶吳興

衢州霜橘紫金苞
玉液瓊漿不用調
此物遠來三百里
香風散滿駱駝橋

沈長山山莊

苦蓼滿汀花映窗蜀山飛過雁雙雙豆棚欹側侵書架
梧葉顛狂撲酒缸

蓮花堦上草虫鳴處處村庄白菜生賓雁成行如一字
冠鳧作陣似風聲

東家園裡撲黃柑西岸墳前種石楠蚯蚓似蛇緣短壁
鷺鷥如鶴下澄潭

王士騏

送顧太史冊封朝鮮

葱秀山頭曉色鮮
月明茅屋漢江船
登臨縱發揮毫興
莫許陪臣有和篇

徹天火樹照邊陲
軟繡肩輿坐自移
到日定知春麥秀
請看箕子廟前碑

贈別

東風吹柳柳成絲
細雨釀花花滿枝
可惜春光正駘蕩
相逢恰是別離時

歸子慕

過王世周北城幽居二首

溪溪綠樹間紅花道是桃源是若耶西近青山東近郭
白雲低處是君家

野徑無人芳草春無情獨對野花新老夫自愛東風立
蝴蝶嬌痴不畏人

北地曉征

夜半寒雞不忍聽主人炊熟夢初醒出門不復知南北

馬上持鞭數七星

高克正

武夸雜詠

雨過春朝倍可憐
芳菲冉冉片帆前
羣仙晞髮知何處
花落花開不記年

畢自嚴

塗次詠桃花

綠楊春樹蔭芳鄰
中有夭桃別樣新
馬上不須頻指點

好花應笑白頭人

石九奏

春郊

三月長安花正飛
長河堤畔柳依依
獨憐芳草王孫路
立盡東風不肯歸

李日華

贈顧長卿

碧梧風葉響虛廊
細葛輕含午夜涼
不獨踈螢能照字

明河高映讀書堂

山居絕句

雪花撩亂撲春蟲
擁褐單牀睡思濃
夢裡一聲聞折竹
呼童亟徙小盆松

四月雨晴山路香
松花洒地鶴翎黃
輕衫短笠荷鋤去
剷得青芝一尺長

贈維揚王孝廉中玄

蕪城春雨漲江沙
沙上紅樓映遠花
一抹濃煙萬株柳

紫騮嘶入玉鈎斜

贈陳禹玉

木蘭零落海棠殘
風雨蕭蕭欲釀寒
花氣曉來渾不定
暗隨春夢到江干

謝肇淞

錢唐逢康元龍

黃梅細雨暗江關
我入西吳君欲還
馬上相逢須盡醉
明朝知隔幾重山

聞鐘寄曾人倩

十年去國夢滄浪
夜夜鐘聲似上陽
謾憶長安驅馬伴
東華門外月如霜

雨中度北峽關

溪流曲屈路巉巖
細雨斜風轉不堪
惟有馬頭雲霧裡
青山一片似江南

渡汶河

霜飛月落野雞啼
霧鎖長林水拍堤
夾岸人家寒未起

孤舟已過汶河西

淮上重送永奉

輕黃柳色綠煙含欲折行人自不堪
兩岸梨花寒食雨孤舟今夜泊淮南

夢作

白鶴屏寒月影稀水精簾卷篆煙微
生憎柳絮如蝴蝶撩亂春愁處處飛

春日溯汶河作

東風殘雪繫蘭橈
滿目山川對寂寥
記得門前春水滿
美人蕉壓赤闌橋

葛陽道中雜詩二首

雨中新水漲平沙
芳草連天鳥道斜
隔水松門人不閉
斷橋流水紫藤花

烏桕成林稻滿畦
新篳白酒配黃雞
老農醉卧無人喚
日落子規頭上啼

桃源道中

春風籬落酒旗閒
流水桃花映碧山
寄語漁郎莫深去
洞中未必勝人間

鄧原岳

江上別徐惟和兄弟

驛路風吹楊柳枝
江雲江草不勝悲
也知遠道終須別
借得離筵駐片時

陳价夫

將至珠崖過迴風嶺即事

瓊南漠漠海雲西
瘴嶺秋風客路迷
澗水松蘿猿共飲
夕陽煙樹鳥空啼

黎人射鹿歸深洞
越女乘牛度晚溪
更欲摩崖書別恨
古苔封盡不堪題

陳薦夫

寄懷王震甫客蜀

邛邛東望草離離
峽口春歸未有期
懷古思鄉兩行淚
豈堪同在聽猿時

宿大橫驛

不堪水驛與山程
愁聽清猿過五更
歸夢欲尋南路去
門前又有馬蹄聲

丁肇亨

立秋

一簾初卷月如秋
涼氣初生暑未收
萬葉初黃金井冷
千林初綠玉簫愁
臥聽鄰砧不耐愁

湯賓尹

梅泉二首

何處西方有美人
貌中風雪意中春
尋常摸索無緣得
忽漫相逢野水濱

寒水泠泠駐碧潭
悠悠香韻鼻端參
月明繚繞羅浮夢
合向其中置睡菴

王思任

勺園

纔辭帝里入風煙
處處亭臺鏡裏天
夢到江南深樹底

吳兒歌板放秋船

沈琬

漂母

偶然一飯進王孫
荅贈千金未足論
何事怨家還報德
淮陰年少亦推恩

曹學佺

留別金陵

微月斜陽影已低
風霜四起夕淒淒
烏生兩翼不飛去

只在白門城上啼

除夕東非熊茂之

度嶺穿林境孰如懷人遙望片雲居應知寂寞禪關裡
一樹梅花共歲除

板橋

兩岸人家傍柳條玄暉遺跡自蕭蕭曾為一夜青山客
未得無情過板橋

清溪朱邑宰里人也以荔支名綠扶包者見餉

三灣亭子寄山坳夾樹人家似鳥巢
謾說故鄉相見好
荔支先餉綠扶包

顧起元

曉行道中

曉風蕭颯逗疎楊
此日關山別恨長
試聽高城吹畫角
秋河不動月如霜

靈濟宮

星幢霞旆畫繽紛
十二瓊樓駐彩雲
鸞鶴紫笙時上下

步虛雙引玉晨君

陳邦瞻

後湖看荷花

綠水紅蕖欲斷腸
可憐秋色似橫塘
晚風不見木蘭棹
明月無人花自香

素世振

無題

飯罷開門看晚天
斜陽依舊送鳴蟬
回頭失却從前路

徵逐香蘿三十年

董應舉

金山作

南條一線自峨岷
拆楚分吳劃到天
獨有妙高臺上月
不為南北隔風煙

何棟如

午日秦淮雜詠

深潭日落停舟滿
高柳橋迴夾岸齊
燈影不分波上下

人聲莫辨水東西

范鳳翼

秋日渡江

瓜渚輕舠破浪風
金山麓亂流中秋
高不避波濤險
欲看江南柿葉紅

田居

夜來霖雨足西莊
薄醉攜僮看插秧
岸樹成行霑溼重
低枝壓帽棗花香

退園即事

遲日偷閒一舉卮
流光堪惜更堪悲
鼠姑開遍春餘幾
為倩封姨且莫吹

螺髻江干蘸碧濃
近來老眼漸朦朧
何當砍却前溪樹
送出欄頭幾片峯

鄧雲霄

隄上行

萬井樓臺落鏡中
環隄處處小橋通
吳娃慣蕩蓮舟劇

水淺沙明不畏風

黃汝亨

寄家書口占

柳岸風來九月秋
片帆一夕過揚州
鄉心無限書難盡
殘吹數聲移晚舟

樵風涇

水南門外耶溪東
多少遊人棹短篷
一自仙郎移羽箭
晚風歸去趁樵風

送張肅之歸山陰

青溪明月碧梧林，一片秋光蕩遠岑。
正好邀歡歌子夜，不堪雪棹入山陰。

阮自華

江南

雲邊畫閣幾時春，遙映江南柳色新。
立馬長干愁不折，無因寄與望中人。

曹徵庸

南康官舍

偶住江城池上亭
長松苦竹伴餘清
牆西秋色斜陽外
截得廬山一角明

張以誠

贈蕭大將軍移鎮漁陽

鳴沙城北接雲中
千里飛狐一道通
十萬健兒齊上馬
旌旗獵獵動秋風

王衡

支硎山口占

曉山煙重暮山開
石馬三朝半綠苔
掃得墓門清似水
梅花昨夜又飛來

花朝

晴煙膏露若為容
躑躅香苞望曉紅
莫怨五更風色惡
開花原是落花風

送范長白東歸余亦後此歸矣

六街燈火柳煙霏
紅入東山舊舞衣
為語青城歸去鶴

弓彎如月背人飛

池上即事

含情落葉已繽紛
深轉歌喉齒未分
橋上玉人真咫尺
簫聲似隔數重雲

熊明遇

詠藕

秋深素節出汚池
渾似江梅雪裏枝
拾取寒香清浸月
仙人掌上露凝時

尋芳人盡看荷花蕩漾荷珠照曉霞
蘂蘼紫苞新採後
西風剪出玉槎牙

釣舟

竹竿溪上釣魚舟
洞口桃花信水流
曉月半輪新雨霽
春山缺處是嚴州

公鼐

習家池

峴首峇堯漢水長
習家煙樹野亭荒
羊公流涕山公醉

並立殘碑卧夕陽

明湖獨眺

窄岸平橋萬柳斜
半城春水半人家
東風吹雨宵來急
一片鄉心到海涯

南樓

十二樓開列玉京
分明天上落層城
檐前寂寂三珠樹
半夜鶴飛枝上鳴

掖縣道中

齊疆行盡海雲生處處看山自問名麥秀漸漸桑柘綠
馬頭不見曲侯城

董光宏

許昌道中

青郊小雨裊游塵正是芳菲一半春花柳故園應共笑
主人歲歲作行人

雷思霈

贈劉七

劉郎讀書王郎館酒到看花興到詩無事過余談竟日
竹邊雙雀立多時

袁懋謙

同年郭太素從廣陵攜姬人為白下之游賦別
白門花月可憐宵宛轉朱欄映畫橋怪得彩雲飛不散
玉人新度廣陵簫

劉宗周

陽穀道中辭春

春入桃源許避秦
乾坤投爾乞閒身
不知歲月隨流水
一任鶯花繾主人

北來山色初如黛
一半春前送客還
黃石不知何處是
教人指點穀城山

除夕示敬伯

曉日離離檜影斜
一聲寒陣起棲鴉
客情只坐殘書好
莫問他鄉度歲華

別雲門

百尺溪頭纜竹船
溪雲送別寺門前
平生最是多情處
只恐山僧似大顛

徐禎稷

浦口望金陵

千金紫陌駐遊驂
繡閣銀燈酒半酣
十四年來魂夢斷
今朝江北望江南

徐冽

夜坐對酒

松醪初熟甕生香
數盞醺然對夜涼
好拂桃笙魂夢穩
月斜桐樹影初長

已許侯封在醉鄉
百年須醉萬千場
不嫌醉裏踈狂發
自是先生醒更狂

張鼎

夜坐

香浮簾外疑花笑
影到窗前喜月來
獨有苦吟人未睡
三更移步點蒼苔

睡起

乳燕自來花不語沙鷗尋伴水常閒
覺來睡眼模糊處
半枕白雲半枕山

野竹

何處小橋繞綠水誰家茅屋挂青山
逢人若問桃源路
半在斜陽花塢間

為沈幼玉題美人採花圖

朝籠輕靄暮籠霞春入歌樓第幾家
逐伴女郎來鬪草

數聲啼鳥滿園花

鶯啼深樹燕還樓
晴日花香滿院浮
笑折一枝迎玉輦
春風早到殿西頭

題畫扇

小橋流水帶垂楊
倚杖柴門看夕陽
淺色白雲濃色翠
曉山一抹幾般粧

沈珣

鄭州道中

鄭州城北水連空
蘋葉荷花處處風
無數沙鷗飛上下
馬頭彷彿見江東

女郎綺生卜居江上

窈窕紅樓隔舊京
重簾瑟瑟擁雕楹
樓前咫尺官橋路
認得蕭郎白馬聲

楊鶴

與丁唯一 有序 錄一首

唯一余同社也
聞余被逮自里門
跋涉數千里來

都門相省出獄後復同策驢南還感而贈之

故人日夜望金雞不信君恩早放魔並馬綠楊沽酒處
春風一路聽黃鸝

孫承宗

二月聞雁

九月邊庭無雁來關門不逐雁門開春來塞上希矰繳
花信風前一一回

餅花

高牙風峭戟枝寒
杏蕊新香春未闌
却憶韋家花樹會
關城初向一鉞看

閱弓箭手

三年又見柳依依
細柳營中剗柳歸
却喜丹臺新燕子
學成白羽水平飛

送友人

山城吹角月婆婆
一派秋聲向客多
已是愁中聽不得
那堪重唱渭城歌

閒圃

閒身終日比雲閒
不是秋風棲碧山
却訝枝頭雙白鳥
夕陽飛倦未知還

秋日飲甯氏水亭

孤閣臨流混太清
煙波渺渺抱重城
西風莫卷枯荷盡
醉客重來聽雨聲

中右所不寐

滿城鈴柝夜如何
檐馬西風攪夢多
白髮蕭蕭人不寐

半規新月照沙河

李流芳

送汪伯昭遊白門伯昭將自京口至棲霞寺因

憶舊遊走筆得四絕句

錄二首

雞籠山閣舊居停曲檻迴廊幾度經最是城陰秋望好

覆舟遙接蔣山青

覆舟山在雞籠之前

鼓樓岡下路高低處處蘿牆映竹畦記得清涼留宿夜

香燈貝葉雨窗西

丙午余與仲和寓清涼寺伯昭自雞籠策蹇相訪值雨留宿

滕縣道中

山欲開雲柳乍風杜梨花白小桃紅
三年三月官橋路
策蹇經過似夢中

玉岑閒行口占

玉岑山脚水潈洄寒日暉暉下稻堆
穿過松岡尋法相
滿空黃葉打頭來

雨中看梅西磧卽事

邨園門巷逐花低藤蔓桑條咫尺迷
花底泉聲認歸路

沿流直到石橋西

題畫似雪嶠師

千峯頂上只通雲一水人家別有村
直到前山蘭若路清鐘落日不逢君

唐時升

田家即事

棟花簌簌柳穆穆犬吠西鄰餉麥蠶
雨過木棉齊放葉相邀作社到城南

新成燕麥欲相扶
風急高楊落乳烏
社酒醒來人寂寂
紫桐花下數雞雛

舟中即事

風捲黃河兩岸沙
中流艇子一時斜
故園柳絮應飛盡
河北行人見雪花

婁堅

聞禽閣絕句為顧學憲賦

小閣深深曲徑開
竹光長送午陰來
主人暫遣清商歇

別有幽禽勸酒盃

鳥啼何處最關情
不是啼時分外清
酒醒閣中聞喚起
為驚殘月半窗明

婁塘里桃蹊即事三首

迎潮小艇漉魚蝦
臨水居人引釣車
不怕桃源迷處所
潮回應帶樹頭花

雨洗燕脂風捲霞
醒來零落醉時花
殘樽好為輕陰盡
一片澄波隔絳紗

無數亂紅看不足碧潭還對一枝斜春光欲去誰留得
水面浮來幾落花

程嘉燧

水上倡樓

水樹風帆隱伎樓微明遠岸濁河流也知一望堪腸斷
暮雨無人在上頭

虎丘

風散桐花松月開上方樓殿踏歌來攜將蘆管新調曲

吹向生公舊講臺

瓜洲渡頭風雪欲回南岸不得

平分南北是江流南岸相期北岸留惟有寒風吹向北
為君留客醉瓜洲

曲中聽黃問琴歌分韻八首

夜掃歌樓集鈿車白頭占曲點紅牙梁間三日餘音在
偷得新腔遍狹邪

牙字

初學鶯簧響露梢還疑鳳吹拂雲旂金屏笑劇如花女

紅豆憑將記曲拋

拋字

莫論歌難聽亦稀坐中有客欲沾衣不看天上行雲駐
試辨林端木葉飛

飛字

曾憐古調背同時廿載心期老曲師為是唱情聽不得

髣邊先著幾莖絲

絲字

歌郎酒客盡知名畫燭紅妝作隊迎檐竹蕭蕭香閣裡
花繁十月坐流鶯

鶯字

緩節安歌妙入神玉盤鈴走串珠勻小姬情事防人覺

挽著雙蛾不肯顰

顰字

輕染鴉黃拂髻鬟
鶯雛巧笑闌
雙彎不知水調聲能苦
感損橫波一寸山

彎字

十分飛盞任君銜
四座無聲罷酒監
更請白頭歌一曲
不須看舞越羅衫

監字

許敬韋白下寄丙午所畫秦淮秋雨索題

六年光景未題詩
畫得如塵似夢時
斷雨濕雲休細看
看來容易髣成絲

登樓

少小聽歌怕唱愁一聲楚尾與吳頭
如今身在傷心地但見春光莫上樓

題畫

客路無媒類轉蓬人間薄命是丹楓
胭脂縱似桃花色難挽春光二月紅

比玉畫霜葉紅於二月花索詩與妓

陳繼儒

余常過一山鄰老而嗜花紅紫映戶弄孫負日

使人不復知有城居車馬之鬧贈以詩

有箇小扉松下開
堂前蔬藥繞畦栽
老翁抱孫不抱甕
剛欲灌花山雨來

村居

青草湖邊白石西
花籬茅屋酒帘低
來來去去雙黃鳥
不到濃陰不肯啼

沈聖岐

送閔昭余出守漳南

閩南虎竹三千里
茗水漁村二十年
別後相思夢何處
刺桐花發海雲邊

即事送吳翁晉

百尺飛絲送柳花
青春欲暮未還家
揚鞭忽到鳴笳處
一笑初停白鼻騮

姚祚瑞

春閨

薄暮輕寒入綺疏
海棠春去落紅疎
微風吹動鞦韆索

愁在高樓明月初

細草無人綠自勻
野花隨意逐芳津
斜風小艇寒煙外
春在前溪寂寞濱

鍾惺

桃源詞

商山海上半秦民
何獨桃源是避秦
滿洞仙人一漁子
翻疑漁子是仙人

譚元春

岳麓山下送周宜一還棹

維舟柳港愛山邊
笑語紛紛就醉眠
昨日茶蘼黃一架
送君心到野塘天

王志堅

送陳獻甫之雲棲

寶刀隴上日初沈
壁觀峯前雲正深
四十八聲清夜發
教人失却少年心

尹嘉賓

寄破山樵者李超無

結隱深隨麋鹿羣上方鐘磬斷知聞空山歲晚多冰雪
若箇峯頭踏凍雲

江上雜詠三首

河豚雪後春還淺刀鱗風來水已波攜酒江邊吹笛坐
那山今日出雲多

杏花淡淡柳絲絲畫舸春江聽雨時漸捲鶴洲江色紫
沙鷗睡著不曾知

王象春

石城月

金陵王氣未曾消
水泊秦淮江上潮
月到石頭城下好
碧雲紅樹聽吹簫

山家

山家香穉飽椿芽
雨歇籬傍自種花
割麥績麻旋剥棗
一年三度坐牛車

陳翼飛

上元夜別

金雁欹斜記昔年輕籠慢撚最堪憐
四條絃索無端絕
一夕春風也颯然

荔枝詞

梧州四月火山紅南海丹時黃雀風
不及閩中焦核好
定應饒殺葛仙翁

朱大啓

黃巖道中

萬樹縈雲白滿山
桃花幾點破紅顏
春風盡日黃巖裡
數遍峯頭不肯還

寓龍灣清明日同張明宇踏青思鄉

登臨徙倚總關情
歸卧空齋鳩對鳴
密雨吹風燈欲暗
不堪清夜踏歌聲

題集影閣

朱檻臨流映碧天
參差竹樹落霞邊
隔溪倒插峯頭月
一枕殘書抱影眠

郭忠宁

渡江

飄然一棹泝空明
日午春潮尚未生
回首江南增客戀
新晴鐘鼓潤州城

楊嗣昌

江陵曉渡

寒日汀洲煙霧輕
古隄疎柳隔江明
漁歌唱到無人處
遠雁微波相映聲

陸夢龍

宿東林寺

禪房獨樹鳥爭棲
月色冥濛霧漸迷
曉起不知山路滑
西風吹雨過前谿

李衷純

順昌道中

山如眉黛水如羅
谿上人家繡戶多
十五小姬催客醉
銀箏彈出伯勞歌

聞啓祥

同顏公游西山

青龍橋外柳如煙一片西湖一帶泉
恰似江南三月景
可憐有水只無船

吳伯與

水碓

白石青泉盡日春
餘音一片和疎鐘
巖花亂逐前溪落
點破春雲第幾重

范景文

阻風夜泊

橈停月落暗江灘
何處吹帆夜未眠
自是隨風儂不慣
乘流莫怨下來船

呂維祺

春日范質公寄詩奉和

記得來年對酒餘
小牕拈韻看盆魚
自從忙到春光了
腸斷東風半紙書

憐春春望望東溟一派雲煙畫不成尋到武陵花放處
漁郎可是便無情

午睡

晴日落花花更開半牆新柳帶煙來可憐春色偏宜睡
不是流鶯喚不回

劉榮嗣

題畫二首

老去登臨怯杖藤好山不上最高層疎松幾樹斜陽裏

閒看巖前掃葉僧

灌木陰陰溪水斜
溪頭鷗鷺浴晴沙
春潮退後風生急
魚網船梢挂落花

方孔炤

天池寺文殊臺

鐵船欲渡石門曉
秋光何事閒雲繞
忽然霽色送東林
影子蓮花開未了

曹履吉

歲雲晚步

淺深叢綠隱僧迦
雨過新泉出徑斜
獨倚山門看歸鳥
幾羣揉落白桐花

萬景

修竹

琅玕千畝拂雲齊
日影參差亂渭溪
但恐玉簫風過弄
夜來驚散鳳凰棲

朱泰禎

睡鴨

綠萍掃罷柳梢齊
疎雨斜陽思轉迷
此際池塘眠正穩
風花吹雪過橋西

黃尊素

馬上

層冰積雪逗村家
半去春光柳未芽
一日鳴驄南陌上
黃鸝已鬧杏頭花

秋浦草

江城三月綠迢迢一片新煙帶雨嬌
送盡王孫何限意
偏留明月伴中宵

黃承昊

過長溝見蜀山湖荷花沿隄二十里有作

雲山渺渺水漉漉香滿長堤物外秋
只少若耶溪上女
乘潮一弄采蓮舟

阮大鍼

偶過長板橋感舊

秦淮何處饒秋色長板荒橋霜草多惟有春風寄樊口
當筵能唱隔江歌

雷塘

雷塘無限白楊花寒食西風集暮鴉莫向舊隄窺柳色
春鋤爭上玉鈎斜

姚希孟

秋感

秋容已到菊花枝閉戶蕭然誦楚詞憔悴江蘼人不見

滿庭涼月照相思

侯恪

送陳集生使南海

鳳闕春深柳乍齊
王孫臺畔草萋萋
看君絳節天南去
驛路晴花送馬蹄

張瑋

嘿思仲先約過詹所茶山園
以事不偕小詩代

訊

一徑寒雲似練開
茶煙起處小車來
獨憐久病閒雙屐
不踏孤山十畝苔

玄默

泥溝驛

寒雲漠漠月初彎
村舍無人戶早關
十二樓中愁積雪
不知人在賀蘭山

馬任遠

抵蘇州

酒醒夢斷旅帆孤
遠岸晴波戲浴鳬
橋過橫塘聞犬吠
綠楊影裏是姑蘇

蔡懋德

見雁懷人

蜀水初來雁影新
蘆花不肯厭秋貧
瀟湘此去無多路
未有沙鷗作主人

毛以燿

山陰王伯良久滯京師却寄

蛾眉十樣逐時新不是東隣亦效顰況是浣紗溪上客
那能不憶浣紗人

張可大

泛海

到處啼鶯倚棹歌客懷偏向布帆多黃雲飛盡天如洗
鰲背山前萬頃波

莫是龍

出都逢馮元成駕部道上言別

試看歸雁與征鴻君自西飛我自東立馬道傍無一語
祇因雙淚洒西風

聞馮咸甫游太山詩以贈之

平生瓢笠興何長遊到名山喜欲狂日觀峯頭聞叫嘯
目窮雲海見扶桑

朱茂時

荏平道中

殘星數點照人行撲面涼沙惹去程回首鵲華山盡失

又騎羸馬過荏平

顧斗英

秦淮小姬

一片春山乍學描
纏頭初試紫霞綃
臺無數青青柳
最惹東風是嫩條

鄔佐卿

宮詞

複道傳呼御輦過
遙聞仙樂動雲和
黃金縱買長門賦

逝水終慚太液波

沈泰鴻

春思

亂水浮花正掩門
花神零落未招魂
春心不與春光盡
細向羅衫覓酒痕

淚灑梨雲作雨痕
半生春事不堪論
遊絲恠底無拘束
逢著花枝便斷魂

長安雨後

京塵行處是風煙
春曉常疑欲暮天
惟有濯枝新雨後
江南無夢也泠然

黃繼立

初夏

楊花初點渡頭萍
十姊妹花紅滿屏
門前忽見漁舟過
風送鷗鷺一陣腥

龔勛

立秋

煙雲黯慘仲宣樓
荏苒年華逝水流
白首鄉山千里外
滿城風雨又新秋

黃時

孟嘗君養士處

官橋垂柳嬾闌干
古薛遺墟駐馬看
食客三千容易散
至今惟說一馮驩

李德繼

懷包參軍

極目西來山色秋但聞長笛不勝愁故人家在清江上
潮滿門前月滿樓

田藝蘅

月夜即席示座客

雲散江城玉漏遙月華浮動可憐宵停歌不飲君何待
試問當年李玉簫

玉簫蜀宮人愛唱王衍宮詞月華如水浸宮殿有酒不醉真癡人之句

謝三秀

題趙文度畫西溪梅花

欲雪不雪天淒淒南枝北枝開漸齊因訪梅花過橋去
始知春在西溪西

吳稼登

代寄徐仲容

秋雨踈踈滴井梧風吹妾夢到東吳生來自恨青谿近
獨處無郎似小姑

春夢

羣書一束枕山楹殘雪融檐作雨聲春夢不隨春水漫

片時還到闔閭城

薛文炳

閒居雜興

最愛江南小滿天
櫻桃爛熟海魚鮮
一聲布穀啼殘雨
松影半簾山日懸

吳元樂

湖上憶別

河橋三月水平津
兩岸輕波漾綠蘋
曾向此中傷遠別

故人今隔幾回春



御選明詩卷一百十一



總校官庶吉士臣侍朝

校對官編修臣莫瞻業

謄錄監生臣和其聲

欽定四庫全書薈要

集部

御選明詩卷二百十二

詳校官原任主事

臣李斯咏



欽定四庫全書薈要卷一萬八千六百十二

集部

御選明詩卷一百十二

七言絕句十二

宋登春

送句吳豪士重遊大梁

魏王臺上草紛紛
落日中原低暮雲
匹馬浪遊孤劍在
酬恩誰說信陵君

汴水東流接大河
曾經帝里問銅駝
春風三月旗亭酒



落日夸門一放歌

沙塵風起晝冥冥二月黃河尚帶冰
桑柘夕陽村店路同誰走馬弔韓陵

春郊即事

春風嫋嫋夕陽西芳草菲菲楊柳堤
行盡溪山有茅屋青林深處一鳩啼

荊州公餽酒

菱葉青青水荇齊
遶籬黃蝶菜苗肥
夕陽誰送山人醉

坐看兒童跨犢歸

秋風嫋嫋熟黃梁池上鵝肥酒更香
醉裏不妨學楚語
竹枝歌好和漁郎

踏青楊林洲

驂騑蹀躞上芳洲楊柳青青楚水流
日暮東風搖百草
不知何處是昭丘

春陰

竹裏松間石徑斜春雲長遶野人家
幽窗睡覺烏聲響

童子開關掃落花

贈東隅逸人

東隅老人能養拙
春來釀酒摘松葉
有時半醉臨風前
獨抱瑤琴嘯海月

柳應芳

勞勞亭送客

勞勞亭下路東西
翻遣行人到此迷
山鳥似經離別過
至今不敢盡情啼

雨中集清涼寺送梅子馬赴楚曹能始還閩
客路東西莫厭長七閩原自隔三湘離人不道俱千里
一夜相思夢兩鄉

賦得千山紅樹送姚園客還閩

蕭蕭淺絳霜初醉
槭槭深紅雨復然
染得千林秋一色
還家只當是春天

楊承鯤

憶事

何處吹簫夜色涼
不勝哀怨濕衣裳
平湖百丈天如水
露滴藕花秋夢長

翡翠簾櫳白玉宮
碧雲無影佛燈紅
夜深下界行人絕
一片經聲在半空

雪曉懷西清田舍

種來黃獨已如拳
手斲冰膚煮澗泉
酒醒雪晴無一事
竹窗炊火送新煙

沈懋嘉

秋鳥

陳山西麓海東頭
細網長竿帶綠溝
買得山禽如粉脆
屠墳十里稻花秋

陳有守

觀音巖

紺閣披雲竹樹參
天花傳說見優曇
妙音一去諸天遠
癡絕行人拜石龕

盛時泰

寄武林朱九疑

湖上輕風拂柳條
美人吹笛向平橋
欲知胥浦潮初退
正是秦淮雪半消

贈蔡公子

桃花落盡客重來
明月高天照酒杯
最愛主人年少日
淮陰市上釣魚回

俞安期

代送中使織袞還朝

織罷冰綃進御歸
鮫人水國暫停機
自憐不及吳蠶老
一吐新絲上袞衣

何白

莫愁湖逢程德懋

莫愁湖邊驚暮春
暖風霽日搖青蘋
柳條繫馬不辭醉
飛絮滿天逢故人

陸弼

贈金陵馬姬

杏花屋角響春鳩
沈水香殘懶下樓
剪得石榴新樣子
不教人見玉雙鉤

晚泊毘陵諸君攜酒過集舟中

孤城春水浸桃花
白髮逢君酒重賒
一曲清歌滿船月
不知今夜是天涯

黃克晦

康州圖

亂山無徑不通樵
漁舍陰陰映綠蕉
樹杪泥乾江水落

村邊沙白瘴煙消

胡宗仁

郊行

每出幽尋杖短藜
無窮勝事愜幽期
村村野老柴門裏
日對雲山自不知

雨後

陰陰春日暖風輕
新水溪灣到岸平
宿雨濕山深樹暗
夕陽開浦遠山明

王嗣經

青溪水亭遲葉五循甫

淶水微風爽氣新
重重樓榭接花津
葡萄葉暗宜留客
楊柳條疎好望人

王伯稠

聽沈二彈北曲

燕歌撩亂夜絃鳴
訴盡青樓恨別情
四十年前明月夜
夢迴曾聽斷腸聲

訪周子居幽居不遇

寂寂柴門深自關
幽禽相喚語青山
墻頭含雨桃花色
半出青蔥春樹間

贈歌者

盡說青樓碧玉家
舞風歌月鬪鉛華
自從悞識櫻桃後
懶看閭門路畔花

涼生豆花

豆花初放晚涼淒
碧葉陰中絡緯啼
貪與鄰翁棚底話

不知新月照清溪

秋日過子問郊居

葉舫百轉入幽溪
灌木蒼藤夾岸迷
一縷炊煙小犬吠
柴門忽出竹叢西

映竹緣溪三兩家
陰陰樹影日將斜
翩翩黃蝶穿疎蓼
唧唧秋蟲語豆花

林世璧

秋宮詞

碧天涼月湛悠悠
獨上高樓望女牛
昨夜西風何處起
宮中無樹不知秋

汪禮約

寄懷

朝雲不散暮雲流
溪上茆堂水竹幽
忽見斜陽滿高樹
亂蟬風葉似深秋

汪元英

秋日歸自溪上

清溪一曲石橋橫十里籃輿溪上行
水碧沙明看不足
西風兩岸盡秋聲

程可中

上谷

鈴閣西頭馬埒平紫騮牽過赤繁纓
翻身誰中金錢的
嘶入垂楊一片聲

葉太叔

同友人飲秦淮酒樓

秦淮水漲鱗魚肥滿店楊花作絮飛日暮酒闌無箇事
渡頭閒數畫船歸

李桂

江上

鯉魚風起荻花秋露壓蘼葭水不流何處津亭夜吹笛
白雲明月總關愁

盛鳴世

送王山人

寒原一雁下霜空
短褐蕭蕭犯北風
俱是殘年行路客
傷心不在別離中

題岳陽酒家

巴陵壓酒洞庭春
楚女當壚勸客頻
莫上高樓望湖水
煙波二月已愁人

江上別柳陳父

滄江落日黯生愁
楓葉蘋花送客舟
莫道酒闌容易別
秋光偏在斷橋頭

送胡參軍之岷州

寶劍翩翩賦遠遊
東風吹騎出幽州
洮河三月流漸下
人在長城天盡頭

陳鳴陽

閨情

露冷凌波步不前
流螢相撲自年年
妾身未似齊紈扇
不待秋來已棄捐

林國光

金陵尋舍弟聞先三日往蕪湖悵然賦此

春江雨漲綠平堤岸柳青青拂水齊日暮相思不相見
鵲鷓飛過野塘西

侯維垣

九日送友人入九華

秋空削出青蓮花時吐白雲含紫霞九月九日九華去
此中可以鍊丹砂

江禹奠

江口

江口風微江水平
櫓搖清影雪花明
鍾陵只在浮雲裏
猶惜孤帆半日程

秋夜聞砧

雨過江村漾晚晴
錚錚木石作秋聲
羈人正念寒衣薄
何處敲霜到月明

九日登山

東籬菊蕊半含黃
酒伴何須定故鄉
寄語柴桑陶處士

百年風物幾重陽

村居即事寄天都李使君

日照雲林宿雨休一灣溪水入江流
野人家住清溪上坐對寒山兩岸秋

蔣世模

江行

晴沙漾漾見飛鳧隔浦帆檣乍有無
身在江南望江北接天秋水浸菰蒲

王授

送常熟李瑞卿

柳暗花明春雨天
鶉鳩聲裏一歸船
相逢已是十年別
為問人生幾十年

潘鏞

寄懷

孤燈一點照書龕
離思沈沈睡正酣
無那角聲吹落月
夢魂飛不到江南

鄧秉貞

嚴子陵釣壇

經過百世見清風
爭羨羊裘一老翁
不有雲臺諸將力
釣壇亦在戰爭中

王壑

南安道中

疊疊青山曲曲溪
湍流活活雨淒淒
孤舟日暮南來客
恨殺鷓鴣相向啼

趙雲蒸

北上

飛沙如雪晝茫茫始覺長安道路長
遙憶小樓臨水曲
八窗風日正虛涼

顧孟林

夜飲王中丞元美宅

與君湖海各棲遲
一夕相逢酒百卮
醉後不知何以別
醒來惟記月明時

方于魯

送張山人歸越

雉子斑斑麥正齊
黃梅四月雨淒淒
新安江上攜尊酒
送爾看山到浙西

璞石席上作

十年不慣出家門
千里來逢故舊存
正值江干春未晚
萋萋荻笋煮河豚

向杰

題畫

雨過迴塘水亂流
汕魚人去櫂孤舟
荻花楓葉寒江外
獨鶴一聲霜滿樓

寄羽士

幾欲尋真未得閒
白雲堆裏望玄關
煩君多養雪色鹿
借我來時騎看山

周履靖

春日過東臯殷君齋頭出示舷上人所贈索和

倚韻五絕 錄二首

西澣曾聞隱接輿
朝來得叩白雲居
窗明室靜清如許
几上風翻種樹書

逃名不用買山居
煙雨湖頭可結廬
月映碧波鷗鷺集
菰蒲深處釣潛魚

清嘯

采蕨東山趁月歸
不妨清露濕荷衣
到家小犬迎人吠
老婦攜兒候竹扉

白李紅桃障錦屏如絲楊柳草青山中風致休教負
一曲清歌倒玉瓶

江上聞雁

孤舟維住綠楊溪霜落蘆花客思悽夢覺蓬窗天未曉
雁聲嘹唳月初西

潘之恒

白下逢梁伯龍感舊

梨園處處按新詞桃葉家家度翠眉一自流傳江左調

令人却憶六朝詩

聽錢二弟子馬生奏曲

鑾江侍女競雙聲
半入吳城半越城
總是西施歌舞地
江南何處不含情

春雨

流水浮香送畫船
凌波何處不堪憐
西來一片橫塘雨
淨洗花容分外妍

吳夢暘

再過汪景純

金陵樂府杜秋娘宛轉新聲隱洞房
林木盡飛江水咽
那教人聽不回腸

送翁晉東遊

春風常在故人前為折新花媚別筵
惱殺當筵飛片片
可能吹到渡江船

古道菴望華亭

沿江遙指白雲隈樹底空牀徧綠苔
今夜道人來借宿

前峯先有鶴飛回

茅維

寄訊李白父徵君

聞君老病掩雙扉
秋老荒園黃蝶飛
手爨青松飯香稻
隔溪人語采菱歸

病忘真是息心方
兀坐揩頤木脚牀
天末涼風吹老樹
看他屋角送斜陽

范訥

王蜀宮詞

匝匝渠穿宛轉橋綺羅香暖月迢迢
海南蜃市渾無異
添得歌聲墮九霄

孟蜀宮詞

池西別殿署凌波楊柳風微月漸多
珠箔捲來秋似水
填詞惟教艷娘歌

送一公還天界寺

江流汨汨樹層層短笠空瓢去秣陵
依舊青山風雪裏

華門深掩一龕燈

荆溪

亂水聲中繫艇斜
月寒沽酒扣誰家
仙源咫尺不知處
紅葉吹來如落花

泝上嘲吳凝父

林皋葉脫風淒淒
遠峯森立寒雲齊
滿船離思半江月
未到五更雞亂啼

暮春閒居和蓋卿姪

舍南舍北雨聲催
欸欸閒鷗逐隊來
欲買魚蝦喚江艇
棟花臨水葦門開

送茅薦卿水部使還留都

雪溪春水接長干
五日郵程去不難
問寢但留諸弟在
雙魚容易報平安

春日訊吳允兆

遠樹微波黯不分
闔閭城畔寄孤雲
春來儘有還鄉夢
除却青山便是君

夜泊梁溪

牆上烏啼月滿灘
月和殘雪耐人看
半爐爇盡沈香火
消受蓬窗一夜寒

泊燕子磯

山影沈沈日乍紅
峭帆人怯剪江風
鷗鳬占我曾題石
一半崦嵫疊浪中

寄阮堅之司理

訟庭寂寂散春煙
碧海丹山在目前
市得蝦姑堪佐酒

摘來荔子不論錢

別時江草冷蕭蕭再見春光上柳條萬一故人生遠夢
也應先過伯通橋

贈王曰常

一月留君興未闌酒盃無限費春寒海棠欲卸辛夸盡
取次看花到牡丹

遇俞獻父

與汝垂髫共里閭別來不省六年餘情知一見又成別

猶勝逢人數寄書

送僧入廬山

霜天一衲影蕭蕭別路無多覺路遙他日有人來入社
不妨行過虎溪橋

吳鼎芳

聞簫聲

洞簫如縷到尊前明月高樓夜可憐何處一聲悽易斷
千家花柳障晴煙

寄情

殘山如黛月痕斜
子夜青鞵踏淺沙
十里紅橋東畔路
梅花多處是君家

山居雜詠

接葉陰陰喚水鳩
花坪草堰偶經遊
芒鞋曬向西巖石
露冷煙淒不記收

萬竹千松遠近同
嫩嵐殘靄有無中
斜陽不會藏蹤跡
露出前峯一抹紅

苔花滿徑綠雲涼嫩竹離離覆短牆院靜晝長人不到
一簾風裊一爐香

赤城

南北峯青雨乍分瀑花飄下雪紛紛空巖夜久無羣動
一點閒燈伴白雲

華頂

海色迢迢半紫氛娑羅開落夏將分道人清曉下山去
紙被一牀鋪白雲

鐵板嶂

一屏渾鐵自天成
倒影清波月正明
三十六峯秋色裏
幔亭高處獨吹笙

托鉢

十里春風五里橋
到山猶覺路峒嶢
叢叢花草蕭蕭竹
幾處柴門閉寂寥

泊潯陽江

倚棹秋光對碧峯
露香傾下木芙蓉
西林月白東林曉

兩處敲殘百八鐘

春暮

一半筠簾上小鉤殘書數卷未經收東風忒也司閒事
吹得瓶花滿案頭

遲舜五不至

數點殘星秋耿耿斜風剪碎芭蕉影自愛凭闌不愛眠
轆轤牽動鴛鴦井

吳兆

送友人遊燕

離筵別棹暮江濱
紅樹青山映白蘋
一過江南風景異
兩行衰柳送行人

秋思

蒹葭霜冷雁初還
歸夢如雲只戀山
一夜潺湲西澗雨
夜來秋氣滿人間

訪沈逸人不遇

閒尋芳草到門遲
雲水無心本不期
枕畔殘書猶自在

主人出戶未多時

寄陳使君抑之

海南無雁亦無秋萬里何人寄遠愁
寂寂孤眠淮上月
憑風吹夢到羅浮

與喻應益言別

楊柳河橋日向新空江無處不通津
留君且過花時去
共泛青谿曲曲春

別九華山

寺前秋淨萬峯閒正好尋山又別山谷轉谿迴留不住
水聲相送到人間

寄曹能始

幾年山水共閒遊無日吟詩不唱酬一畝故園春又暮
棟花零落漸谿頭

登天臺峯宿

峯離寺二十里
山之最髙者

蘿磴松崖幾百層猿攀魚貫始徐登昨朝望處今宵歇
巖下雲埋入定僧

暮春偶過山家

山林處處採新茶一道春流繞幾家
石徑行來微有跡不知滿地是松花

沈野

春日小齋

社日方過花正肥閒庭亦自長苔衣
柴扉暫啓元無事恐有梁間燕子歸

斜塘招星甫

新芋肥雞菊正黃君來定擬醉千觴
田家村巷都相似
須識門前兩綠楊

贈殷山人

鹿門高卧寂無譁戶外青山郭外斜
婦解綉花君解畫
玉窗閒坐闕新茶

石沆

宿城中舊房

從教雁侶失瀟湘春色年年暗洞房
遺得一枝花影子

夜深隨月轉西廊

夜聽琵琶

娉婷少婦未關愁
清夜琵琶上小樓
裂帛一聲江月白
碧雲飛起四山秋

夏日寄懷南逸士

南隣何異北山居
黃草衣裳白草廬
閒却農桑事吟弄
不教風月著空虛

有懷

遠村幽壑獨徘徊
雲護柴扉雪護苔
盡日溪邊倚枯柳
白鷗何事不飛來

寄敏上人

別來多雨更多風
野水蒼茫浸碧空
惆悵數枝憔悴柳
不堪持贈膽瓶中

秦鎬

冬夜見新月

霜天約略一鉤斜
半挂平蕪半遠沙
照向兩鄉偏是缺

不知圓處落誰家

商家梅

聽同舟人吹簫

有客同舟月正來
閒吹玉管思徘徊
數聲只在霜篷裏
却似江頭寒雁哀

題受之津逮軒

雖然城市即山居
纔理清齋木石餘
坐卧此中心自遠
月來先照滿牀書

宋珏

過燕磯懷孟陽

孤帆落照在磯頭
風引歌聲喚客留
正欲低徊尋往事
紛紛木葉下江流

將歸白下留題侯豫瞻畫壁

酒中別意畫中花
梅半殘時柳半芽
我欲橋邊添箇客
醉眠芳草不思家

泊皖城三日懷白下故人

城依碎石岸依沙行遍城南乏酒家日暮客愁如白下
蘆花風起似楊花

汪逸

丹陽道中別芳生

風過重陽易作寒去來俱泊此河干無端別路舟車異
一日楓林不共看

董斯張

梅谿

雲似魚鱗壓市低竹簾載筍出梅谿逢人閒問崑山路
葛嶺西頭更向西

葛鵲作二首

筍鞭橫出欲穿籬松子纔生鼠不知細雨一林山鬼語
白鷗浴起葛公池

鴉銜朱柿墜秋坡竹筧疏泉帶碧莎野菊滿頭山下女
也能學唱采茶歌

吳門道中

柳花片片拂船窓
雪點湖田鷺幾雙
數到明朝寒食夜
半篷殘照過吳江

初夏

楊柳陰濃曳碧煙
一溪不雨不晴天
水樓處處凭紅袖
吳下新來茉莉船

王道通

馬首

馬首衝煙健鶻飛
南山如畫隔薔薇
十年寶劒屠兒笑

獵得黃羊間道歸

齊菜名

蟬

曲曲朱欄橋半欹
藕花村裏水流澌
長堤高柳蟬聲急
帶却斜陽過別枝

錦帳詞戲贈程寅之

臂綃繫得下妝臺
錦帳芙蓉並蒂開
露淨一天清似水
黃姑昨夜渡河來

吳沛

讀古歷禪空不知清明之至

近來課業覺辛勤底事春消客邸情忽見老僧贈垂柳
始知今日是清明

唐汝詢

夜別陸長倩得青字

悵別高樓酒易醒坐聞落葉滿沙汀春來倘憶同遊地
無限垂楊夢裏青

留別沈茂之

風雅翩翩自不羣
榮華入目總浮雲
江湖此去無知己
蚤晚移家欲就君

沈大俊

山齋聞鶯

貝葉亭前綠始榮
黃鶯偏愛曉時鳴
雙雙深坐梧桐裏
語盡春風無限情

陳玄肩

過鷺峯寺訪非熊

綠陰深寺獨經過有客孤吟寄薜蘿
容易相逢容易去
晚花歷亂鳥聲多

鄒之翰

春暮泊吳山

扁舟泊處有漁磯為惜春光歷翠微
花片亂飛飛不去
從風復上酒人衣

王龍起

春醒

細雨春寒酒未醒
吟魂牢碌怨飄零
房空寂寂疎簾捲
楊柳花飛滿畫屏

三山龍臺村夜望

越王臺下古城汾
近水人家傍竹陰
夜夜月明愁絕處
斷橋秋露濕寒砧

方登

春日漫興

懸巖絕壑春雲滿
亭子無人鳥自啼
昨夜雨飛寒未解
桃花零落石城西

李至清

題畫寄鄒公履

一帶雲山如夢裏
片帆別處不分明
傷心只說寒塘柳
泣雨啼煙送我行

唐正雅

遲友不至

閒齋卓筆賦初成
颯颯西風滿戶生
細雨乍來君不至
寂寥把觥對寒檠

王人鑑

春寒

林風溪雨弄春陰
古屋凝寒午更深
煙火蕭條人迹斷
自籠雙袖聽新禽

沈璜

移家虎丘

杜鵑零落柳藏鴉僧有餘閒轉法華山下人家春事了
掃門迎接贛州花

顧大武

登廣武岡漢高數項羽處

三尺寒流數仞岡兩雄曾此話興亡漢家事業由天幸
十罪空勞數項王

徐于

柳絲別意

攪亂春愁是柳枝銷魂多在送迎時
風絲試舞纔迎到露葉含啼又別離

蕩颺晴絲蕩颺魂不知何處斷愁根
霏霏拂拂凝香雨糝作青衫別淚痕

道旁搖漾拂離筵相顧攀條涕泣然
始信有情無過柳為君三起又三眠

搓絲撚縷玉樓西倒侵春波碧欲迷
只怕苦風老雨後不容飛絮不沾泥

劉侃

過水下口

山樹參差石徑斜
雨餘飛瀑過桑麻
山翁放罷村前犢
倚杖溪頭護稻花

都城元夕

一夕春從天上回
六街火樹徹明開
叮嚀莫似吹蘆管
纔報梅開又落梅

春暮

風吹山色度簾櫳
指點荼蘼半已空
二十四番花信過
獨留芳草送殘紅

豐越人

吹笛

空林醉卧不知秋
手采芙蓉下小舟
明月滿天涼似水
閒吹短笛過滄洲

錢希言

闕峯晉濟寺

關公山繞關公湖捨定年猶記赤烏寂寂寺門霜葉裏
水禽飛上石浮屠

簡沈從先

雨過秋山翠滿城思君江館入蛩聲夜涼獨坐銀河下
吟到酒醒溪月明

陳鳴鶴

題冲佑觀

十二仙人控紫鸞頂門一去不曾還當時雞犬昇天盡

只有浮雲住世間

康彥登

宮詞

銅龍曉漏滴蓬萊
天半傳喧便殿開
一霎燈光齊散盡
春寒勅與放朝回

王毓德

度仙霞嶺

已恨闔天道路賒
更堪回首隔仙霞
潺湲已是他鄉水

縱使東流不到家

蘭溪夜泊

暮雨孤村繫客船
漁燈相對未成眠
思家淚共蘭溪水
一樣潺湲過枕邊

何其漁

梅口待渡

野曠微風起白蘋
村居三里若比鄰
江干風冷秋山暮
立盡斜陽無渡人

山下買酒

隔浦漁家傍酒家
漁罾掩映酒帘斜
探囊恰好供歸客
買得黃魚并杏花

碧簫洞

石橋宛轉竹檀欒
松露侵衣夜未乾
三十六峯秋一色
碧雲吹出洞簫寒

林宗大

送人尉蜀

百仞高峯入縣門
官閒何地不君恩
莫將萬里思家淚
落盡巴江一夜猿

徐穎

嚴陵

石几朝朝立鷺絲
苔檐露折野棠枝
雙臺占得高千尺
不許他人下釣絲

紀青

宿石公澗中

小閣久留高士卧鹿皮夢破石床苔半林曙色生巖牖
山鳥不來山雨來

暮春入棲霞山尋張文寺

山氣陰陰出荷鋤才分瓜子又挑蔬倦來芍藥花前卧
帶雨鳴鳩過草廬

山中口號

一月林中不裹巾得錢沽酒未知貧樵夫相見漫相識
除却青山無故人

夜行潭上

四更山月吐清輝
人在花林未肯眠
寂寂一峯寒插水
雁聲飛過放魚船

枕上聞風

疎懶而今成自然
醒來不是聽雞年
霜風一夜寒多少
重理禪衣覆足眠

周楷

宿已公巖

已公巖畔水粼粼樹老雲荒記往因一夜溪聲聽不得
遊山真愧住山人

童珮

顧懋儉約看青墩荷花不得往

羣玉峯西一片霞游人為說是蓮花可憐不得同船采
今夜秋江月自華

楊文驄

夜過練瀆

松風謾謾澗粼粼金鎖曾輝畫角新借問水犀三十萬
何如君子六千人

龔用圓

湖上遇同年朱子暇

一見相攜話舊遊湖光汎汎斷橋頭寒煙迷却西泠路
還向當壚問酒樓

蔣德璟

至廣州聞黎捷志喜

重開幕府試琱戈七哨功成獻凱歌
借問凌煙誰第一
漢家劍履賜蕭何

鄭鄮

夢中句

一聲鐵笛下雲洲
吹破江天萬古愁
杯酒不空人欲去
青青柳色尚樓頭

齊心孝

答女郎沙蘭英貽鴛鴦枕

含情少婦倚銀缸
繡罷鴛鴦日滿窓
解得世間離別苦
故將好鳥織成雙

何萬化

贈別

彩鷁銀燈此夜親
相看莫惜酒盃頻
明朝茅店風霜苦
縱有盈觴不醉人

蕭士瑋

月夜西泠橋

霧鬢煙鬟逐處嬌
輕風著面酒初消
月明故國三千里
人在西泠第一橋

張國維

登采石贈諸將

月明橫槩倚層峯
宵柝風飄和梵鐘
舊是開平賈勇處
諸君努力此書庸

吳孔嘉

竹

幾竿清影映窗紗
篩月梳風帶雨斜
相對此君殊不俗
幽齋松徑伴梅花

木芙蓉

半臨秋水照新粧
淡靜丰神冷艷裳
堪與菊英稱晚節
愛他含雨拒清霜

宋玫

閨思

征人磧裡正思鄉
八月看雲送雁行
生小不知門外路

如何飛夢到沙場

李模

南思

畦丁忽報韭芽春
對對河魴入饌新
笑指蘆根堪續命
不須子細祝廚人

陸澄原


溪外

短橋隱隱隔清溪
溪外人家更向西
行盡西溪人不見

一林修竹畫眉啼



御選明詩卷一百十二



總校官庶吉士臣侍朝
校對官編修臣莫瞻莒
謄錄監生臣和其聲